

Og Sulat ni Paul dia sog Poktanudanan ditu' sog Kolosas

Og Piuna Talu' pa'ali sog Sulatni Paul dia sog Poktanudanan ditu' sog Kolosas

Og sulat ni Paul koni posungu' sog poktanudanan dia ni Isukristu nog ditu' sog Kolosas. Og koliwagan bonua nog Kolosas koni, ditu' sog bukid nog Epasis. Og poktanudanan koyon dion, tinumabuk ilan dia ni Isus kona' po' si Paul og mikuna mogustal dun dianilan. Tibua, misakup ion dia sog bonua kitu' nog pigboya'an ni Paul sog tang nog kopogonong non kitu' sog Epasis po' ngon og poktanudanan sog Episis nog pipangoy non ditu' sog Kolosas. Miobonobon tidu ditu', kisunan ni Paul nog ngon og polopanadanan nog di' motud dion sog glumpuk nog poktanudanan koyon sog Kolosas nog mikpanad nog bila og gotow moleg mokosun nog Mikpongon bu mogawon tidu sog dusaanan non, sumboy tumamuy ion dow dia sog duma kounutananan nog diwataan. Bu sumboy dosop inangon non og polomotadon mama' nog maktuk, bu sumboy unuton dow og gli'linan nog pongonganon, bu og duma polomotadon.

Sa'an itu' sinulat ni Paul ini, po' og susion non og pikpanad nilan koyon bianan sog motud nog gustalan pa'ali sog kopoktanud dia ni Isukristu. Og tabal non nog pikpanad nilan koyon ma' nini: Si Isukristu da og mokogawon dia sog gotowanan tidu sog baya' nog dusa. Bu ain og pikpanad nog mosuoy dion, da'idun og sagnat non. Po' bianan dia ni Kristu, og dunya koni inimumog nog Mikpongon, bu bianan dosop dianon pitiguli' non dia sog dili non. Da'idun lual og bianan dun nog motabang nog dunya koni dia sog baya' nog dusa, da' lual bianan da dia ni Kristu. Tubus nitu', ustalon ni Paul bog olo ma'ana nini sog gotowanan, sog ain sinumolabuk na dia ni Kristu.

Og sulat koni, og sinoligan mokpitang dun ditu' sog Kolosas si Tikikus ilan ni Onesimus. Og Onesimus koni, og gulipon kitu' nog pingingolotan ni Paul dia ni Pilimon bianan sog sulat non kitu'.

1. Og bokna nog sulat koni, 1:1-8.
2. Og glangkalangka bu og ginang ni Kristu, 1:9-2:19.
3. Og bogu kotubu' nog ain sinumolabuk dia ni Kristu, 2:20-4:6.
4. Og doksu'an nog sulat koni, 4:7-18.

1 ¹Akon si Paul, og mikpoit nog surat koni, og sosugu'on ni Kristu Isus bianan sog baya' nog Mikpongon. Og surat koni tidu dianakon bu dia ni Timuti nog gilug ta sog tanud.

²Og surat nami koni posungu' dia sog pigotowan nog Mikpongon dia sog koliwagan bonua nog Kolosas, ain og pigilugananan nami sog tanud nog mipagon na dia sog kosolabuk nilan dia ni Kristu.

Og tulung bu kotikna' nog pikilan mongon dianiu tidu sog Gama' ta nog Mikpongon.

Og gyakin nog kopokposolamat

³Giap nog pogyokinan nami amu, moksolamat ami dia sog Mikpongon nog og Gama' nog Kounutan ta nog si Isukristu ⁴po' midongog nami pa'ali sog kopongandol niu dia ni Kristu Isus bu asta dosop sog kolalam niu dia sog glam nog pigotowan nog Mikpongon. ⁵Bu og kopongandol niu bu glolaman niu koyon dia piingkod sog dodomaan niu kitu' nog molongas, nog sinimpan dianiu ditu' sog glangit. Bu dia niu itu' midongog sog motud nog talu' nog ion non ion og Gomba'is nog Guksugan nog midopot dianiu. ⁶Bu og Gomba'is nog Guksugan koni pikpulonag na dia sog gliwag nog dunya nog boya'an modakol tinumud dun bu miksop og polomotadon nilan mama' niu, dangan midongog niu bu misabut niu bog andun kotud og tulung nog Mikpongon. ⁷Bu og Guksugan koni kionadan niu dia ni Epapras, ion dosop og duma nami nog kololaman bu ion si'oy og sosoligan ni Kristu nog sinumoliu dianami mangoy dion niu. ⁸Bu piguksugan non dianami pa'ali sog glolaman niu nog miktidu sog Bolakat nog Mikpongon.

⁹Dadi sa'an itu', tidu sog gondow kitu' nog kodongog nami dun asta sog numun koni, pogyokinan nami amu. Bu pokpongonion nami sog Mikpongon nog mosabut niu tokodoy og glegan non bianan sog sabut bu og kotalus nog miktidu sog Bolakat non ¹⁰bagun niu molangka ain kolegan nog Pogbaya' nog ginangon niu nog mondom kosu'atan ion dianiu kobon non. Og doku'an non, minang niu og glam nog molongas nog kohinangan, bu posisaya' pogdungag og sabut niu pa'ali sog Mikpongon. ¹¹Bu pongoningonion nami dosop nog popogonon non amu tokodoy bianan sog dasig nog Bolakat non nog di' kolobian bagun amu mokogaga dunut ompayat og ponutus niu sog glam non. Bu pogda'da' amu ¹²kobon niu mokposolamat dia sog Gama' ta nog Mikpongon po' ion og migbogoy dianiu nog kopatut bagun amu dosop mosunu' sog sinimpan non kitu' nog pusaka' dia sog pigotowan non. Og sinimpanan non dun, ain misakup dia sog pigdotu'an non, nog ion non ion og kodolagan. ¹³Ginawon non na ita tidu sog kopogbaya' ni Kindagow, nog ion non ion og kodoloman. Bu linalin non na ita dia sog pigdotu'an nog Bata' non

nog kololaman non. ¹⁴Po' bianan dianon milokat ita. Og ma'ana non, inompunan non na og dusaanan ta.

Og kotas ni Kristu

¹⁵Po' si Kristu, ion og glimbagan nog Mikpongon nog di' ta motongow. Ion og mikuna sog glam nog piongon. ¹⁶Bu glam non miongon bianan dianon, sog glangit bu sog glupa'an, ain motongow, bu ain di' motongow, og pogbaya'anan bu og kounutananan nog diwataanan, bu bolakatanan nog kona' sagyaotow asta sog kilawan. Glam non miongon bianan dia ni Kristu, bu glam non ion gapu' non. ¹⁷Sog da'idun pa og miongon, ion donsama' na. Bu glam non miksiningkotoy bianan sog kosolabuk nilan dianon. ¹⁸Bu inimung ion nog Kounutan nog pinonggi' ion dia sog gulu. Og glawas non, ion non ion og tibuk nog pigotowanan non. Ion og poktiduan nog kotubu' nilan. Bu ion dosop og mikuna motubu' tidu sog patoy bagun da ion mimung nog motas sog glam non. ¹⁹Po' kolegan nog Mikpongon og kodiwata non bu og kodiwata ni Kristu, ion non da. ²⁰Bu kolegan non dosop nog bianan dia ni Kristu, og glam non motiguli' dianon, glam nog gotowanan ditu' sog glangit bu dini sog glupa'an. Po' bianan sog dugu' ni Kristu nog miglayas dia sog kudas, miglogomigus og glam non dianon.

²¹Po' amu, dini kitu' da'idun singkot niu dianon. Bu mibanta niu ion sabap sog kolaton nog kohinangan bu pomikilan niu. ²²Tibua numun koni, bianan sog kopatoy nog glawas ni Kristu, tiniguli' non amu bagun amu mokindog dia sog sungu'an non nog modulus bu da' na sila'on daniu. ²³Tibua, na' niu kiankianon og tud niu dianon, somo' ita da ompagon amu dianon bu di' amu mogdua'dua' sog dodomaan niu nog miktidu sog Gomba'is nog Guksugan. Ion non ion og Gomba'is nog Guksugan nog midongog niu na bu mipulonag na sog gliwag nog dunya. Bu akon, si Paul, og sinoligan dosop mopulonag dun.

Og polosuku'an ni Paul sog poktanudanan

²⁴Migda'da' u tanan sog sinsaan ku koni numun koni sabap sog kopogustal u koni daniu. Po' og sinsaan nog glawas u koni miimung og pongoktub sog sinsaan ni Kristu dia sog pigotowan non nog ion non pinonggi' dia sog glawas non. ²⁵Po' akon si'oy, miimung u dosop nog sosoligan nog pigotowan nog Mikpongon bianan sog ginang nog piinang nog Mikpongon dianakon mogustal mahatul daniu nog talu' non. ²⁶Og talu' non koyon nog pigolong, ion non og milimod kitu' tidu pa sog kobon nitu' dia sog gotowanan. Tibua, numun koni pitampal na dia sog pigotowan non. ²⁷Po' og kolegan nog Mikpongon, potompalon non dia sog ain pigotowan non bagun motampal dia sog glam nog binonsaan bog andun koba'is non kitu', nog milimod bosia. Og ma'ana non, si

Kristu mogonong dianita. Bu bianan dianon ngon landu' gloliag nog pigdodomaan ta.

²⁸Dadi, si Kristu og pikpulonag nami sog glam nog gotow. Bu pimali bu pikpanad nami sog glam nog gotow bianan sog dalom nog kotoan nog binogoy non po' bagun da ilan og monala kotow dianilan muakil nami nog mihurup ilan dia ni Kristu. ²⁹Bagun ini minang, monamal u moginang bianan sog dasig nog binogoy ni Kristu kitu' dianakon nog kitu' og mimung og pagas u moginang dun.

2 ¹Sa'an ini tolu'on ku daniu bog andun og bayu' nog koponamal u bagun amu kobo'isan dun, bu ilan si'oy sog bonua nog Laudisia, bu asta og glam nog dumaanan kitu' nog da' ilan pa sibon pokolumpak dianakon. ²Sa'an inangon ku ini po' bagun glam niu kopondolo'isogan dun, bu bagun amu moksolabuk dia sog kopokilolamoy niu po' bagun amu kongonan nog sabut nog boya'an mosabut niu tokodoy og pikilan nog Mikpongon nog milimod dini kitu' nog ion non si Kristu. ³Po' dianon tinagu' og glam nog kotoan bu dalom nog sabut nog Mikpongon. ⁴Tolu'on ku ini daniu bagun amu ondi' kolimbungan nog pomali kitu' nog ma' nog migusoy migukpatukpat og kopoktalul' nilan dun nog saka ondi' dumalan. ⁵Po' minsan da' dion og dili glawas u, dion da niu og pikilan ku. Bu doma, migda'da' u nog midongog u og kopoksolabuk niu bu og kopagon nog kopongandol niu dia ni Kristu.

Og gustalan nog dumalan sog motud

⁶Dadi, bila ma' nion tinumabuk amu noma dia ni Kristu Isus nog ion og Kounutan niu, sumboy motongow dia sog glangkalangka niu og kosolabuk niu dianon. ⁷Ponginggamut amu dianon, bu singkot niu og polomotadon niu dianon bagun ompagon og tud niu sog piktonudan kitu' nog pianad daniu. Bu koponu' amu kobon non nog kopokposolamat dianon.

⁸Dadi, pokpotubud amu bagun amu di' moit nog minsan sima nog gotow bianan sog glimbung bu pomali nilan nog da' doksu' non. Po' og pagon nog pomali nilan koyon nog ma' nion sagya da og pikilan nog sagyaotow, bu sagya da og solosila, otawaka sagya da og polomotadon nog dinunya. Kona' dia miktidu ni Kristu. ⁹Po' dia sog dili ni Kristu kotongow og tibuk nog kodiwata nog Mikpongon. ¹⁰Bu bianan sog kosolabuk niu dia ni Kristu, mohurup amu dosop. Bu ion motas pa sog glam nog kodotu'ananan nog kodiwotaan.

¹¹Dadi, bianan sog kosolabuk niu dianon, tinuk non na amu. Kona' tuk nog sagya gotow, suga'id non, og ma'ana non, inawa' ita na ni Kristu dia sog baya' nog dusa. ¹²Dangan binunyagan amu, misunu' amu na sog kolobong dianon bu sog kotubu' non tidu matoy bianan sog kopongandol niu dia sog dasig nog Bolakat nog Mikpongon nog mikpotubu' dianon

tidu matoy. ¹³Po' dini kitu', sog motaan nog Mikpongon, og kotubu' niu da' pa kosingkot dia sog Mikpongon po' da' amu pa tukoy ni Kristu. Og ma'ana non, pigboya'an amu pa nog dusa. Tibua numun koni, og Mikpongon, sinunu' non na amu sog kotubu' ni Kristu tidu matoy. Inompunan non na ita sog glam nog dusaanan ta. ¹⁴Dadi, di' ita na mosugat nog polihala' nog Mikpongon minsan si'oy da' ta kunut og dan Botad kitu'. Po' inawa' non na itu' bianan sog kolansang dia ni Kristu sog kudus. ¹⁵Bu bianan sog kopatoy non sog kudus, inimung non na nog di' mokpondag og baya' nog kodotu'an bu og glam nog kodiwotaan. Bu pitampal non na ilan bagun kotoksi'an nog ion doda' og pondag sog glam non, bianan sog kopatoy non sog kudus.

¹⁶Dadi bila ma' nitu', na' niu potiangan ain sumila' dianiu kobal nog di' amu mogbilang nog pomali nilan koyon nog pa'ali sog pongonganon, otawaka ginumon, otawaka pa'ali sog minsan olo kologya'anoy dun, ma' nog kologya'an nilan koyon sog bata' bulan, otawaka og gli'inan nilan koyon pa'ali sog Gondow nog Pogulali. ¹⁷Po' glam nog polomotadon koyon sagya da og nuni nog ngon pusungu' matong nog ion non ion si Kristu. ¹⁸Bu na' amu moit dun po' sagya ilan da mokpotopoto sabap sog ponoginopon nilan. Po' sagya ilan da og mokpopotongow. Bu sagya ilan tibua sumugyut dia sog moloikatanan. Po' dianilan koyon miktidu da sog sagya pikilan nog gotow bu da' doksu' non ¹⁹po' da' ilan na singkot dia ni Kristu. Po' si Kristu og Pogbaya', pinonggi' ion sog gulu bu ita og glawas non. Dadi, bianan sog gokbitan non, og glam ta miksiningkotoy ita bu miimung ita ma' nog glegan nog Mikpongon dianita.

²⁰Dadi bila ma' nitu', misunu' amu noma dia sog kopatoy ni Kristu nog boya'an da' amu na pogboya'oy nog pikilan nog sagya og ginungod otawaka og kinilawan, iduma mokokunut amu poma dia sog polomotadon nilan koyon? Ma' nion koyon, ma' pa nog dia amu sog dinunya. ²¹Og dondagan nilan koyon nog ma' nog di' tumuyok, bu di' mogaid, bu di' minam. ²²Og polomotadon nilan koyon nog ma' nion, sagya da miktidu sog botad bu sog pogonadan nog gotow. Po' glam nog ma' nion koyon, da' kotodayan non. ²³Tibua, og bayu'bayu' nog polomotadon nilan mama' da nog molongas, po' polomotadon nilan koyon sagya da og dili glegan nilan sumugyut dia sog moloikatanan, bu mokpopotongow ilan nog kopokpobaba' nilan, bu og gli'inan nilan dia sog glawas nilan ompihit, saka ondi' bololaga' dianilan og maktigol nog napsu nilan.

Og polomotadon nog modulus

3 ¹Dadi, bila ma' nion nog sinunu' amu noma dia ni Kristu sog kopotubu' dianon tidu sog patoy, ngon na og bogu kotubu' niu. Dadi, sumboy og pogdopoton niu kobon non ain dia sog ditas, sog pigdotu'an nog Mikpongon po' ditu' si Kristu pogingkud sog dapit glintu non.

²Sumboy kobon non tigbungon niu og pomikilan niu sog ain pigdotu'an nog Mikpongon kona' dia sog ain dini sog dinunya, ³po' minatoy amu na sog dinunya. Suga'id non, og kotubu' niu tinagu' na dia ni Kristu nog dia sog Mikpongon. ⁴Dadi, og tantu kotubu' niu si Kristu. Bu bila ion mokpotongow mokpuli' dini, ita si'oy motongow ita dosop sumolabuk sog kotas non.

⁵Dadi, bila ma' nion minatoy amu noma dia sog glegan niu kitu' nog dinunya, sumboy di' amu na momabal bu moginang nog duma kosipogsipog. Bu sumboy kotigolan niu og napsu niu. Bu na' amu mogabak, po' og ma'ana non mimung nog kitu' na og piktamuy niu. ⁶Po' sabap sog kohinangan nog ma' nion koyon, ngon gondow non nog polihola'on nog Mikpongon ain moglokohinangan dun po' da' ilan pokokunut dianon. ⁷Dini kitu', og glangka niu dia da sog polomotadon koyon nog ma' nion. ⁸Tibua, numun koni sumboy lumota' amu na moglokohinangan nog ma' nog bululukowon, bu moglolingit, bu moksina, bu monompola' nog pakasi niu, bu moglambas. ⁹Bu na' amu dosop moglinoputoy nog pakasi niu po' og ma' nion koyon, og polomotadon nog kinilawan. Po' di' amu na bosia do'itan mokokunut sog kohinangan kitu' nog pigboya'an nog dusa. ¹⁰Po' sinuklian na og dan polomotadon niu kitu' nog pigboya'an nog dusa, nog bogu polomotadon. Dadi, og bogu pikilan niu koyon nog da' pogboya'oy nog dusa, miongon ion tidu sog Mikpongon bu kobon non pongimboguan non nog ma' nog bantuk non, bagun mosabut niu tokodoy pa'ali dianon. ¹¹Og doksu'an non, mimung da' na pogbigya'oy og gotowanan bila pingimboguan nog Mikpongon po' glam non migbatuk da, og Hudyu otawaka kona' Hudyu, bu ain mituk otawaka da' kotuk, bu ain mikopongadi' otawaka da' pokopongadi', bu motas nog gotow otawaka og gulipon. Po' miksola'buk ilan dia ni Kristu bu ion dia dosop sog glam nilan.

¹²Dadi, bila ma' nitu' og pigotowan amu noma nog Mikpongon nog kololaman non nog pinili' non, sumboy motongow dia sog glangka niu og glolat niu bu og tabang niu dia sog pakasi niu. Bu kobon non sungod niu ilan bu dunut kobaba' nog bolotabat niu, bu kopayat nog ponutus niu. ¹³Bu poglinonggungoy amu bu poginompunoy amu minsan olo og susian niu, ma' nog kopongampun nog Kounutan ta daniu. ¹⁴Bu og kosolag non, sumboy mokilolamoy amu po' bianan sog glolaman, og glam non koni mimung ompagon og kopoksolabuk niu. ¹⁵Bu sog kopoksolabuk niu dia sog solabuk glawas ni Kristu, binogoy non na daniu moglogomigus. Bu sumboy og kopoglogomigus niu koyon og mogbaya' daniu po' sa'an itu' inonggat non amu. Bu kobon non pokposolamat amu dianon. ¹⁶Og pomali ni Kristu sumboy monginggamut daniu bu mogokbit daniu kobon niu momali bu mokpanad sog pakasi niu bianan sog dalom nog sabut niu. Bu bobat niu og kosanglit bu og solamat niu dia sog Mikpongon, bu og

duma bobatanan pa'ali sog kinodiwata. ¹⁷Bu minsan olo ponginangon niu otawaka og poktolu'on niu, sumboy inangon niu bianan dia sog ngalan nog Kounutan ta nog si Isus. Bu bianan dianon, pokposolamat amu dia sog Gama' ta nog Mikpongon.

Og gomba'is nog polomotadon nog poktanudanandia sog baloy

¹⁸Dadi amu kolibunanan nog sinumolabuk na dia ni Kristu, sumboy sumangkan amu sog duoy niu.

¹⁹Bu amu si'oy kolokianan, sumboy kololamoy niu dosop og duoy niu bu na' amu ombolu' dianilan.

²⁰Bu amu si'oy gombata'anan, sumboy kobon non mokokunut amu dia sog mokogulang niu po' ma' nitu' og mosulut sog Kounutan ta.

²¹Bu amu si'oy mokogulang nilan, sumboy na' niu inangan og gombata'anan niu nog boya'an mosingmal ilan dun.

²²Bu amu si'oy og guliponanan, sumboy mokokunut amu sog glam non sog gapu' niu nog dini sog glupa'an. Bu kona' tibua sagya mokpopotongow amu nog ginang niu dianilan bagun amu kodongya'an, suga'id non, potongow niu dianilan og kopoktantu niu sog glam nog ginang niu po' ma' nitu' og kosugyut niu dia sog Kounutan ta. ²³Bu minsan olo ponginangon niu, tigbung niu ditu' og pikilan niu mama' nog dia niu ininang sog Kounutan ta, kona' sog sagyaotow. ²⁴Po' kisunan niu na donsama' nog mokotabuk amu nog tumbas non daniu nog kotubu' nog da' kopus non. Po' og tantu Kounutan niu sog ginang niu, si Kristu. ²⁵Bu ain og moglokohinangan nog molaton, ongon dosop og tumbas non dun. Po' og Mikpongon, bila mukum, ondi' nododa' mogbigya'.

4 ¹Bu amu si'oy nog togo gulipon, sumboy molongas og kopogokbit niu sog gulipon niu. Po' kisunan niu na nog amu si'oy, ngon dosop og Kounutan niu ditu' sog glangit.

Og dungag nog pomali sog glam nog poktanudanan

²Dadi og glam niu, sumboy kobon non pogyakin amu. Bu pongmohilat amu kobon niu mogyakin dunut kopoksolamat niu dia sog Mikpongon.

³Bu pogyakinoy niu dosop ami dini po' bagun ami kobogayan nog dalan mogustal, po' bagun nami mustal og milimod kitu' tidu pa sog kobon nitu' pa'ali dia ni Kristu. Po', sabap sog kopogustal u koni, mikolobusu u tanan dun. ⁴Sa'an itu' sumboy pogyokinan niu akon, po' bagun ku da ompodolag tokodoy og gustalan ku dun. Po' ma' nitu' og polosuku'an ku.

⁵Bu kobon non potubudoy niu og polomotadon niu dia sog ain da' pa kitu' tabuk dia ni Kristu. Bu kobon non pongimakat amu moginang nog omba'is. ⁶Bu og kopoktalu' niu si'oy, sumboy kobon non mosu'at bu omba'is pokinongogan po' bagun niu da ilan motabal nog motud ain moksak kitu' daniu.

Og ponogina ni Paul

⁷Dadi, dinondag u si Tikikus mangoy dion niu. Ion og kololaman ta bu og gilug ta dosop sog tanud. Bu ion si'oy og duma nami nog sosoligan dia sog ginang nog binogoy dianita nog Kounutan ta. Ion og moguksug dianiu pa'ali sog glam nog kibianbianan ku dini. ⁸Sa'an ini sinugu' u ion mangoy dion, po' bagun niu modongog bog olo botangbotang nami dini bu doma, bagun amu dosop kopondolo'isogan dun dianon. ⁹Og duma non mangoy dion niu si Onisimus. Bu ion si'oy og gilug ta dosop sog tanud, nog kololaman ta nog tidu dion sog glumpuk niu. Ilan og moguksug dianiu nog glam nog bianbian nami dini.

¹⁰Bu si Aristarkus, og duma u dini sog kolobusuan, minogina ion dianiu. Bu si Mark si'oy, og goguapu' ni Barnabas, minogina dosop ion dianiu dion. (Bu mitabuk niu da bayu' og pomali u pa'ali dianon nog bila mian ion dion, sumboy tolima'on niu.) ¹¹Bu si Josua nog kodua' ngalan non si Justus, ion si'oy minogina dosop dianiu. Og tolu kotow da koni og salu bansa u nog bansa Hudyu nog tinumabuk na dia ni Kristu, og dinumuma dianakon mokpulonag nog gustalan pa'ali sog pigdotu'an og Mikpongon. Bu kipongomu'an u sabap dianilan. ¹²Bu si Epapras si'oy nog tidu sog glumpuk niu, minogina dosop ion dianiu. Ion og sosoligan dosop ni Kristu Isus. Bu kobon non monamal ion mogyakini pa'ali dianiu nog bagun amu ompagon sog glam nog glegan nog Mikpongon, bu bagun dumalom og sabut niu, bu motintu na tokodoy og tud niu. ¹³Bu kitoksi'an ku da bog andun koponamal non moginang nog kobo'isan niu. Bu kona' tibua dianiu, suga'id non, asta dosop dianilan ditu' sog bonua nog Laudisia, bu bonua nog Hirapolis. ¹⁴Bu si Luk, og polomulung kitu' nog kololaman ta dosop, bu si Dimas si'oy, minogina ilan dosop dianiu. ¹⁵Bu akon si'oy, polatas niu pa og sogina u koni dia sog pigilugan ta kitu' sog tanud ditu' sog Laudisia, bu dosop dia ni Nimpa bu og pigilugan ta sog tanud nog mokpoglumpuk moktamuy dia sog Mikpongon ditu' sog baloy non.

¹⁶Bu bila motubus niu pogbostaoy og sulat u koni, pitang niu dosop ditu' sog Laudisia sog pigilugan ta sog tanud ditu'. Bu og sulat u kitu' ditu' nilan, alap niu dosop bu basta.

¹⁷Bu talu' niu dia ni Arkipus nog sumboy doksu'on non tokodoy og ginang nog binogoy nog Kounutan ta dianon.

¹⁸Bu akon si'oy, monogina u dosop dianiu. (Akon, dili si Paul, og sinumulat nog ponogina u koni dianiu.) Na' niu tokodoy poksolingowan nog dia u sog kolobusuan.

Og tulung nog Mikpongon mongon dianiu.